#### سما محمد حسين

# بنوته بضفاير

شعر

طبعة أولى إبريل 2019



#### بطاقة الكتاب

#### مسابقة شاعر / أديب النيل والفرات الدورة الرابعة – إيريل2019




	اسوره الرابعة البريق
الأول م	لكتاب الفائر بالمركز
	هوع شعر العامية المصرية

عنوان المؤلف
المؤلف
التصنيف
رقم الإيداع القانونى
رقم الإصدار الداخلى
عدد الصفحات

جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب أو ترجمته أو الإقتباس منه أو نشره على النت الا بموافقة كتابية وموثقة من المؤلف



رفصة مراولة مهنة:58365 - سجل تجاري: - 2017 / 2017 - بطالة ضريبية: 35-07-572 - معنو عامل باتحاد الناشرين المصريين رقم 941 لسنة 2018 ماسكة: 020554372901 عيناكس: 0120554372901 عيناكس: 030554372901 عيناكس: 030554372901 النيل والفرات المحاوية ماسكة alnilwaalfourat alnilwaalfourat@gmail.com



#### الإهداء

الى أمي التي تركتني أواجه الحياة بقلب بنوتة بضفاير إلى أسرتي نبض حياتي إلى كل من وقف بجانبي وشجعني ولو بكلمة إلى الشعر وروعته بفرحة وحزنة الذي أعتصر قلبي حتى أخرج لكم حروفة أهدي لكم نبضي الذي ترجمته أحرف وكلمات لعلي أنول رضاكم

#### سمااااا

# محض افتراض

الليل بيسرق آخر ضي بالضلمه ويوزع الضحكه الكئيبه ع البشر حتى القمر.

مخنوق من الليل والسهر .. والإكتئاب على كل باب مكتوب بإنك تنتظر..

نوع العذاب

كداب يا من باع الحقيقة .. بالسراب وكتاب بيقفل صفحته..

على سطر مكتوب بامتعاض

كداب يا من جعل الأمل..

محض افتراض

الحمل زاد

والدنيا عاطيه ضهرها بالعكس



والكسر لوف الضهر زاد..

زاد البعاد

والبعد زاد المشتاقين وقت الجفا

عف الزمن ايام ما كان زمن العفاف

بنْحِسُه ف شعاع الامل

لكنه مات.

وصنوانه جامع للامانى المعدمه

ياضحكه وقت الاحتضار ساكنالى روح

كانت وراحت من زمان .. صبحت جروح

والضي نار

والدار ساكنها كل من كان السبب

تعب القلوب مكتوب

والحبر نقطة دم.

نازله على جروحنا بألم

قال القلم كلمته

والكلمه محسومه كل اللى راح واندفن كان نور صبح ف ضلام وكلام حروفه من دموع ساكته كاتمه اللى فيها شموع مطفيه ف العتمه

قلبى صبح مقتول والجانى كان معروف

صلی علی کعبی

واتوضأ من دمعى

وتلاها احلى حروف .. مسقيه حنيه

كل اللي قاله خداع

ع الكدب مبنيه

حتى الاساس مايل مسنود على خدى عدى عدى عدى عدى عدى عدى عدى عدى المامي ولعمرى انا عدى

كل السنين واحد .. والباقى مش باقى



مر الزمان كان كاس والصبر ترياقي أصبحت روح فانيه هايمه ف بحر الخوف بتشوف لكن عاميه صابها العمى م الشوف وطريق مالوش آخر مكتوبلي انا أمشيه خطوه ورا خطوه وتحت أي ظروف يا حلمنا المخطوف من بين بواقى الصبر هیا کمان خطوه ويجمعنا نفس القبر

#### دقة سلف

قلبي اللي كان طيب بريئ..

مابقاش بيفرق جوا نبضه أي شيئ

أصبح جريئ

عایش بیتدفا بروحه .. وبجروحه

ويًّا بعض

قلبي اللي كان نابض حياه..

مابقاش له نبض

عایش بیحلم بالمافیش

درويش في حضرة اللا شيئ

قلبي اللي كان طيب بريئ..

مابقاش بريئ

محتاج يدوّر في القلوب

على دقه تهديه الأمان .. حتى ولو دقه سلف

مابقتش باشعر بالشغف أو باشتياق

كل اللي باشعر بيه .. أسف

أو نبض حاسس باستياء

والفرح أصبح عنده ۲۰۰۰ ۱۱۱۱۱۱ه

والااااه دواها بكى يشفي جراح الروح

كل اللي كان جوانا راح وانتهى

وبأيه يفيد لو كان نعيدها صلاة

لحظه خشوع القمر لو كان ف يوم اتخسف القلب مايل للحنين للروح غاوى يدارى جوه منه جروح بيبوح بكل مافيه لكنه عذاب

القلب داب

دقاته صبحت دقه واحده وبس بتحس لكن حسه مش مسموع بينادى يلقى الصدى يرجعله من تانى عمره ماكانت ضحكته بخته

حلمه ابتدا وقت (ن) طلوع الروح مسموح اقوله ارتاح وعيش يومك

ولا مجرد كلامي زيف ومش مسموح مطروح من الجمع اللي كان كامل مضروب في نفس الهم 100 مره والقسمه ضاعت والنصيب عامل زى السياج حوالين دموع مره مابقتش ذكرى وخلاص ولا حتى فارق معايا أي شيئ ممكن الروح بتتسكن وتهدا بدون ألم حتى القلم رافض بإنه يكتبك حرفين مسكين وحبره جف م المنبع وماعتش ينفع حبره ع الورقه

حاسس بخنقه بتقتله

ومافيش ايدين تتحمله

حتى الايدين اتكتفت م الهم

والسم زاحف يسرى مجرى الدم

ولامتى هنعافر خلايا البوح

مجروح يداوى جروح ..

عجزوا الاطبا يطيبوا فيها

تلاقيها دايما مابين اتنين .. بروح واحده

جاحده مابتفرقش بین عشق روح حیه

الموت طريق مسدود نمشيه بحنيه

تلاقيك في حيطه سد

ياخدك معاه المد يرميك علي شطه ترجع بدمع الندم وتبوسه على خده ياخدك زبد للبحر تندم على سيرك

طيرك هجر عشه ..

طول عمره غاوى الهجر

وانا بعد طول الصبر ..

قررت اكون زيه

مش هابكي في الضلمه ..

على نور حجب ضيُّه

وهاعيش في نوري اللي اتخلق بيدِي

يا دنيا عيدي اللي اتسرق مني

وانا غصب عني ..

هاعشقك تاني

#### إنت حياة

وقت ما بتشعر بإن القلب جواك نبضته بتنطق حياه..

وقت ما تكون بس كلمه.

بتمحي منك 1000 أأه

وقت ما الاحساس بشوق للفرح جاي يتملكك كل السكك تفتح طريقها لحضن قلب بيعشقك وبصدقك.

لوحتى كان البعد واصل منتهاه

وبيطوي خطوات الزمن..

علشان يادوب نظرة عنيك

وبلمسه واحده من ايديك..

يقدر على كل المحن

ويعيش معاها اللحظه عمر من الحنين وسنين بتطوى الجرح طى وتنادى ويرد الصدى ..الفرح جى ويا الحبيب عاشق ليالى من السهر تلقى القمر والليل بشوق..

ينزل نداه

وان تاه ف يوم القلب بيلاقي الدليل وان طال ف يوم الليل بيشقشق نهار مكتوب علي جبين الزمن بالنور حبيب والدنيا لو تسكن عيونه تطيب ياقلب عاشق للجمال والحب كل الامانى اتجسدت صورتك والنظره منك للعيون.

تصبح صلاه

دا انت القمر غيران عيونه من عنيك

والضى لو شاف طلعتك زانك قلبى اللي عاشقك بالقوى حيران والكون مكانه ف قلبي علشانك كل العيون تتمنى ليك نظرة رضا وانا بس قلبى اللى بيتمناك... نجاه ف ازاى هايقدر قلب مشتاق للحياه انه يعيش من غير وجودك ياللي ف حدودك تنتهي كل الألام وبيبتدي يومي الجديد وبايه يفيد بس الكلام لو كان كلامي بيوصفك حرفين غرام وانت حياه

### هو انت ایه ؟؟

قلبك دا مصنوع من فولاذ و القسوه واخد فيها درجة إمتياز برواز حياتي وانكسر لما لقيت قلبك حجر والصوره بهتانه ف عنيك خوفي عليك خلاك تآمن إن قلبي ملك ليك ف تدوس عليه هو انت ایه استاذ في تبرير العناد مع ان روحي بتنسحب .. وقت اللقا ما بالك انت بالبعاد

بس الحقيقه المدهشه انا قلبي رافض لانقياد من بعد طول التجريه وطول السهاد مابقاش مجرد قلب عاشق بانحياز اصبح .. إزاز مكسور ورافض حد تانى يجبر الكسر اللي فيه هو انت ایه ؟؟ طبعك بتبعد كل ما باشتاق حنين والقلب من كتر الفراق ينزف أنين ولمين هروح واشكيك وانت اللي طول عمرك بتسمع شكوتي والوحده من بعدك بتقتل ف الفؤاد والنار بدال ماتشع نور .. صبحت رماد

مجروحه كل شهادات الهوا منحازه ليك

تلاقيك فتجرى عليك تنادى.. يامن هواه اعزه وازلني إمتى اللقا قلبك سراجي ف دنيتي وف بعده صبح الدمع زادى كل اما تنشف ع الخدود تقسى عليه هو انت ايه دا انت اللي ياما حفرت اسمك ع الشجر ورسمت صورتك بالنجوم من نورها غار منها القمر وناديت بعلو الصوت ..حبيبي وياريت سمعت قلبي اشتراك بالغالي لكن..

انت بعت ضیعت ف القلب الهوی

بالشوق كاويه هو انت ايه ؟!

## إفتراض البعد

لما يبقى القلب قافل صفحته على نبضه خايف انها يوم تهزمه أو تحرمه من انه يتنفس هواك يبقى افتراض البعد .. جايز لماعيني تلمح الضحكه بقت خطین دموع والقلب رافض أي مبدأ للرجوع ممنوع يا شوق المحتاجين لشعاع أمل يكسر جبال المستحيل يبقى البديل انك تسلم لليقين ان افتراض البعد جايز لما تلقى كل ايد صبحت بعيد

والفكر سارح ف الفضا بس القضا...

خلى القمر قابل بأنه يعيش وحيد مين فينا كان عايش سعيد من غير ألم سن القلم مع كل سطر بيكتبه

سل مسم مل سل سسر بر يرسم مع الاحلام دموع موجوعه كل العاشقين ممنوع تقرب م الدوا والضى بيلملم خيوطه وبديله ليل للقلب حاجز

يبقى افتراض البعد .. جايز

لما يكون الكون براح ف ساعات جراح القلب ممكن تستكين والذكريات.

تصبح دوا ... للعاشقين

ويعود ومن تاني الالم مع كل ذكرى ماهى اصل لسه روحى فاكره لما كنا ابد بأبد لما كانت ضحكة الايام تجلجل واحنا ماشيين ف الطريق كان بس كل حلمنا نلقى النهايه نهايه العشاق القلب داق الحب في زمن الاماني واتعود أنه يعيش غريب ف دنيته مستنى يوم يمكن يلاقى حبيب يطلع من الحلم البعيد فايز يبقى المؤكد. إفتراض البعد ... جااااايز

## فجر بيتولد

مليووون حقيقه بتختفي وسط الضباب كداب ياليل العاشقين

مانتش حنين ع الغلابه المجروحين بتغيب سنين..

وتعود معاك اقوى عذاب

لما السراب يخدع عيونك .. يأسرك

يفرض وجوده ع الملأ

حلم اتخلق من بين خيوط المستحيل

مولود هزيل .. وبيتخنق

يبقى النهايه مؤكده وبدون دليل

حلم انتحر..

على اول السكه اللي كانت خادعه

يابحور امالي الواسعه .. غرقان في شطك من زمن يادي المحن اللى بتخلق كل يوم انسان جديد يفضل ينادى ع السراب المحتمل هل من مزید ؟ ف برد بالتأكيد ... أكبيبيد ويعيد كتابة رحلتك ويا الآهات وساعات بيسرح ف الفضا ويرسم أمال وخيال يشوف الضلمه نور وكاسات تدور مليانه وهم ف يشريه ويعيش ف دنيا خلقها من حبة ضباب مع اول الخيط اللي يفصل بين نهارمولود وليل الويل صديقه رفيق ف كل طريق

فيعود يفتح ف العيون يمكن

من بین وبین .. الذکری تانی تعود مولود واول خطوه لیه تلااقیه

بيروح لنار تحرق سنين عمره اللي فات وعشان غشيم وفاكرها نور ف بتخدعه والنور بعيد وكأنه شمعه بتتحرق ف بتسرق من بين ضلوعه بسمته وتودعه

وترجعه لنهایه شبه مؤکده وتسمعه صدی کل صوت

موعود يعيش ويا الليالي وعمر نوره ماتولد عاشق بيحلم باللقى ويفوق علي حبة رتوش مغشوشه احلام البراءه

بتشوف علي مد البصر بحر الامل واما تقرب منَّها تلقاه سراب

وف لحظه تتغير حياتنا تضمنا والنور يعود وكأنه فجر يادوب وليد والعيد برغم انه بعيد لكنه حلم مع كل فجر بيتولد نحلم بقلب يعيش سعيد ونحقق الحلم ف قلوبنا يهزنا ويدلنا

على خيط شعاع الشمس في الفجر الجديد يا كل عشاق الحياه لسه الأمل..

في عيوننا نبته بتتولد والطرح جاي في يوم ..أكيييييييد

# بتشبهني

بتشبهني..

في نبضك حتى والإحساس

وفي الإخلاص

في دقة قلبك الدايبه في عشقي سنين

وصوتك حتى وانت بعيد بيوصلني

بهمس حنين

بتشبهنی ف حاجات یاما ما تتعدش

ولاحدش بيقدر يوصف الحاله

تعالى نعيش في دنيتنا

انا وانت وبس خلاص

بتشبهني..

في نبضك حتى والإحساس

وتشبهني في عشق الليل وحرف جميل بيكتبني على خط الهوى المايل رسايل عشق مكتوبه ف بحر الشوق تاخدنا لفوق ف دنيا كلها احلام ونتمني نعيش فيها على مد البصر بنشوف شعاع الضي ده عشق قلوبنا مالهوش زی بيخلق م الامل بسمه ونسمه لو بتلمسنا تدوب فينا ف ليالينا السهر يحلى ..يناجى الليل دليل العشق نظره عين بتحكى كل اسرارنا وترسم فرحه ف عيونا

وترسمني كأني عروسه بالابيض ولساها بنات الحور بتغزل من ضفايرها سلاسل نور تنور كل ايامنا وتبنى قصور نعيش فيها ليالى كتار ونار الشوق بتحرق لو قابلنا عزول وبدر بدور ف ليالينا بيسقينا كاسات الفرح يموت الجرح جوانا ولو يوم كان قابلنا الشوك بيطرح ورد نطير انا وانت ف سمانا

معانا قلوبنا والعشاق

بتشهد لينا بالاشواق وتحسدني عشان ما انت ..بتشبهني

### عكس السير

قلبي اللي بيسأل عن نبضه.

في غيابك عني

محتاج لو كلمه تطمنى..

وتخلى الروح المشتاقه لنظره عينك

ترجع وتعود

انا شوقى لقلبك ماله حدود

ووجودى لو مش في وجودك

عمرى مايبقالى ف لحظه وجود

ياطريقى اللى بحب امشيه

یابو قلب کبیر بسکن فیه

لو يوم تتألم انا قلبى..

لحظتها يحس

ويدوب لو يسمع منك ااااااه لو حتى بهمس

ياحنين الماضى ويا الامس

يابدايه حلمي اللي انا عايشاه

ونهایه جرح سنین..

انا عایشه عشان انساه

لو قلت الااااااه..

بتمنى تكون جوايا الااااااه

ياربيع العمر اللي انا بتمنى ف يوم القاه

شجرة ايامي اللي ف بعدك

دبلت اوراقها المشتاقه لرييعك حب

والنبض ف قلبى بيندهلك

علشان ترویه..

بحنان القلب

همست عصافير الشوق رقه..

على اغصانها

مشتاقه تزقزق بحنانها



على قصة عشق تحكيها في قلب الليل موال واللحن حزين واللحن حزين باتمنى لو خط حياتنا بقى عكس السير نتقابل تاني وارواحنا ترتاح في ضلوعنا المشتاقه للفرح كتييير

# ضحكة بتتولد غصبأ

لون السما باهت / وجع القلوب دقات الفرحة لية تاهت / والعمر عدى وفات محبوسة ضحكة بتتولد غصباً مقتولة بين احزاني جوا المهد والآهة مفروضة عليك فرضاً شايفة الطريق مسدود ب مليون سد يتهد عمرى اللى اتخلق لحظة والفرحة فيها بتتعدم م الخوف وظروف بتحكى حكاية النظرة ونعيش حياة مرسومة بجراحنا

افراحنا حلم بنحلمه ... أوقات وساعات بنضحك ضحكه تجرحنا ونشوف آلام بنحسها لساعات تخطف دموعنا خطف من جوه احساس وليد يعزف بصوته أهات هات حد عاش مرتاح.. وآلامه تنزف دم ترياق يداوى جراح تسقينا شهد بسم ااااااهه ومكتومه ...بتحسها بتحضنك تكسر قلوب مشتاقه للفرحه و كأنها دقات. لدفوف حياتنا ف زفه العمر اللي باقي بينك وبين كل الاماني .. براااااح بنقيسها بالمسافات

بتدور حكايه عمرنا ف جمله..

عاش عمره كله حى لكنه قلبه مات

# سبحان الله..

انا قلبي اللي اترشّق مسامير..

لستًاه بيدُق

وبيفضح احساس متخبى ف قلب الضلمه

خايف يظهر .. ف بينطق: لأ

وان جيت للحق..

من كتر ما شاف القلب جراح..

قرر يرتاح ويعيش الفرحه وينسى الآه

سبحان الله

مش لاقي طريق الا ومسدود وف آخره ألام بيدور ليل ونهار علي نور يخلقله ضلام وينام القلب وأمله يلاقي صباحه نهار والنار اللي بتحرق قلبه برد علي سلام

اوهام بيعيشها القلب كأنه.

عايشها حيااااااه...

سبحان الله...

انهار الدمع اللي بفيضها تزرع ف ورود والشوك الطارح من حزنه بالجرح يجود ويعود القلب لاحزانه وكأنه عذاب مكتوب علي كل جبين يائس محسوبله حساب وصحيفه عمره المحرومه من اى صلاه سبحان الله

عايش وسنينه عجاف ف عجاف

لكن بيخاف لـ فيوم تخضر

لو تطرح يفرح ف يدوقها يلقاها المر

قلبه المشتاق للفرح يهل.. بطل يحلم

وعيونه المجروحه دموعها .. تطفي شموعها ولا يعرف يوم للفرح نجاه

سبحان الله

وسراب بيقابل خطاوينا ف بيبقى خداع وبجملة احلامى الضايعه

العمر اهو ضاع

واتباع القلب ودقاته من غير ما يئن

مع ان الدقه ف عمري ساعات

وكتييييير بتحن

للفرح يغير احزانها وبتستناه

سبحان الله

ويعود الحلم ويتجدد ف القلب كتير

يتمنى يلاقى ف أيامه لحظه تغيير

والضي المستور ف غيومه يظهر ويطل

وتهل الضحكه المشتاقه لشفايف الكل

ف نحقق حلم كتير غايب وبنتمناه

سيحان الله

## ست الملاح

ضحكه م القلب بتاخدني / والقى كل الكون براح والصباح الجاي باعتلي ابتسامه لا ملامه لما قلبي ـ بعد طول حزنه ـ بيفرح

لما فلبي - بعد طول حزنه - بيفرح بسفر - بيفر بيفر بس لو ايامي تسمح..

كنت اعيش عمري اللي جاي..

بدون جراح

كنت احس الدنيا اجمل

واللى جاى مالوش حدود

والوجود يعشق وجودى..

يخلق الايام اماني بيها تتحطم سدود



القى كل الفرح بسمه راسمه حلم لسه جاى لجل مايعوض حياتى..

ای شیئ عدا وراح

قلبى عاشق

قلبى كل ركن فيه ساكنه الحنين

زى حضن الأم لما يتوجد

يمسح الدمع ف ليالى المجروحين

والجنين اللى يادوب بيخطى خطوه

وضحكه حلوه..

لبنت موصوفه ف كتاب العاشقين

قالوا عنها انها ست الملاح

صوتها نای

بس مابيعزفش حزن

لحنها مخلوق عشاني

فجاه افَتَح..
القى كل الكون قُبالى
اجرى..اتنطط..اغنى
زى طير محبوس ف لحظه
يلقى نفسه بره قفصه..
ف دنيا اوسع م البراح

# الليل يموت

من بين خيوط العنكبوت ..

بالمح حياه

يمكن في وسط الليل تتوه

بالمح ضباب الامنيات رافض يروح

احساس يبوح بالمستحيل

ف تثور كوامن رغبتي في الإنتباه

كل اتجاه ..

في نهايته سد بيمنع الامل اللي باقي

كُتر اشتياقي بينتهي دايما ب آآآه

والاااااه برغم المها ترسم حلمها تزرع آمل تلاقيه طرح

وبرغم ان الزينه مش زينه فرح

ولا ضحكه بتعافر عشان

تخلق مكان علي جبين الاماني

ونعيد ف رسم الصوره تاني

الوان كتير متلخبطه مالهاش ملامح

والفكر سارح

مابین وبین...

طريقين مفيش بينهم تلاقي

وعيون دموعها سنين عجاف

بنخاف نخاف

عفريت بيعشق يقتل الامل الوليد

من قبل ما تلمح عيونه الضي

النبض حي

بس العروق رافضه المرور

قدام طريق الامنيات .. فيه 1000 سور

وبرغم زيف المعجزات

وشريط حياتنا اللي بيخلق ذكريات

العمر عدا بالسكات ..

اللي بيخنق ضحكنا المغشوش

وبالظنون

معتش باقي اي شيئ مضمون وبلفته من رمش العيون نلمح خيوط النور بتنسج حلمها والصوره توضح من جديد وبتختفي كل الرتوش ومن بعيد .. رغم الضباب تظهر ملامح للوشوش والليل يموت

# صندوق الدنيا

صندوق الدنيا اللي مخبي

جواه حكايات ...

قد الدنيا

ايشي أكشن فروسيه ياسيدي

وكوميدي ورومانسي وتراجيدي

ويادوبك عم امام بايديه

ينده ويلف المنافيلا

بتلاقي الدنيا قصاد عينك

صندوق الدنيا اللي مخبي

جواه اسرار

وبعينك شايف ومبخلق

لكن محتار

وتفكر وبتسأل روحك

ييجي 1000 سؤال

هو احنا ازاي عايشين ايام

الباطل فيها بيقلب حق

والظالم عايش دور مظلوم

والبادي بخير بنجاوبه ب لاء

حكاياتنا كتيييير عايشه الدنيا

عايشينها وينموت ف التفاصيل

وان يوم بيميل الحال نبعد

ونعيد ف الصوره ومن تاني

نحلم بحكايه

وبتبقي الدنيا الغداره. للقصه الاولي

هي اللي بترسم تفاصيلها

لكل نهايه

من تاني نلاقي في حكاويها فارس مغوار

بيحارب لجل حبيبته اللي عشقها

بسلاح حبه

وبيرمي بنفسه ف وسط النار

ويعديها ويجوب الدنيا بمآاسيها

وعشان مايفوز اخر المشوار

ويعيش الحلم اللي اتمناه

بيخطي حياااااه

وتلاقي الضحكه اللي تجلجل قلب المجاريح

والريح اللي بترسم لامال ف دموع افراح

والست بهيه الغلبانه بملامح صبر

بتدوق المر.. لكن عايشه

والضحكه مابتفارق عينها

اصلها عارفه ایه اخرتها

مهما نعيشها هنفارق تانى

والحزن الكامن جوه القلب

راح يقتل احلامها ف ثانيه

واهي دي الدنيا

كل الحواديت تنطق احداث

والكل انداس

مستني الفارس ينقذهم بسلاح الحق

والفارس اتأخر جدا

والديك يدن يعلن عن فجر بنوره يهل

والناس هاتشوفوا بعين تانيه

هاتشوفوا حقيقه وملموسه

مش بس ف صندوق الدنيا

#### جوايا حاجات

جوايا حاجات

بتصارع بعض عثبان تطلع...

وتشوف النور

جوايا مشاعر بكر يادوب .. بتخطي السور

علشان تمسك في بواقي الحلم المتبعتر

بين المسافات

احساس بيحاول يتمرد ويهد جدار

وكلام محبوس جوا ف قلبي

حرفه بينزف ويقول اشعار

انذار للضحكه اللي بتطلع قدام الناس

احساس بيدورع البدايات

جوايا حاجات

كراكيب متلخبطه جوا الشق

وبكلمة حق بتترتب حسب الاحوال

ملعونه الآهه اللي بتجرح قلب الموال

ملعون يا خيال

ياللي بتسرق عقل الواحد

ف يعيش متغرب جوا الذات

جوايا حاجات

منقوشه على جدار ايامي

بتخطط مستقبل غامض مع نور الشمس يبان فيخاف ليزوره الليل

حاطط لخطوطه كتير روايات والمخرج واقف مش عارف بيقول كلاكيت اخر مره ويصور ف العيشه المره

وبيحلم يوم عرضها يجمع

افراحنا بتهرب بره الكادر

احلام بكا راسمه عيونها بنات

والحلم بيكبر جوانا

والخطوه بشوق بتعدى بحور وبنات الحور قاعدين ع الشط من تانى كلاكيت

یتغیر مشهد احزانا یتبدل فرح ویموت الجرح فی غربه لیل یظهر من تانی ف قلب الضی تفاریح بتزغرد من تانی

و بنطوی مع جراحنا امبارح وبضحکه نبات

جوایا حاجات مش مکتوبه ..

انما تتحس

مش ضحك وفرح وحزن وبس

ولا حتى كلام عن حب اتعاش وصبح اوهام ولا حتى عذاب وعتاب وملام

والعمر اللي انا قضيته مابين اللأ والآه

خلاني اتأكد ان انا بس ...

جوايا حياه

### بعدين معاك

بعدين معاك

ياللي ملكت الروح بدون حق امتلاك

يا فرحه في الزمن الحزين

وسنين وباستنا هواك

بعدين معاك

كل الحروف تايهه على سطر القصيده

والكلمه رافضه من زمان البوح

والروح تعافر لاجل لحظة نور وليده

دنيا جديده بتبدي بنظرة عنيك

والشوق ناداك

بعدين معاك

ياضى لو يظهر ف يوم

يخلق حياه

ياحلم بيونس طريقى

لو ف يوم القلب تاه

یا ۱۱۱۱۱۱۱ بتتنفس حنین

يا روح بتتجسد ملاك

بعدين معاك

ياكلى كل الامنيات

يوم مالتقيك

ايا اجمل الايام بشوقها

بشوفها فيك

كل اللي بتمناه لقيته

معاك وبيك

وان يوم يانن العين تغيب

يبقى النصيب حتما هلاك

بعدين معاك

## مجنونه .. رزینه

انا يمكن كل اللي يشوفني

يفتكر اني .. عاقله رزينه

او انی یادوب ..

مانيكان اخرس متعلق جوا الفاترينه

انما رغم الامر الواقع ..

انا اكتر بنوته مجنونه

انا اكتر حد بيتشاقى جوا ف نفسه

ويخبي بخوف اللي يحسه

انما نفسه



يشبع تنطيط

وبرغم الظاهر من بره

برسم احلامى بريشه تبان كل الالوان

احمر ..اخضر ..اصفر وابيض

زی قلوب بتدوب احلام

وبدارى ف اشواقى لدنيا

ملیانه جنان

جوايا باداري جناني عشان

لو بان .. ف كلام الناس هايزيد

وكأن البنت المجنونه داخل ذاتها

تقضي حياتها من غير ضحكه

او حتى البسمه الممنوعه من سكّتها

بقرار م الناس

يفرض قهرا قتل الإحساس

جوا الروح المحتاجه تطير ..

من غير جناحات

وتبات مسجونه في اوهامها

سجان عایش لجل مایقتل

كل الافراح اللي بتغزل .. فرحنا فستان

وف لحظه بنخرج من كادر الصوره العتمه

ونلخبط ايامنا ب الوان

والريشه المجنونه بشوكها

تخنقها الكدبه الموصوفه ...

بتقاليد وعادات

# بنوته بضفاير

لسه فاكره كل حاجه

الحوارى ..

القهاوى..

والجيران

الامان ف اللمه والصحبه الجميله

والحبيب اللي عشقته

لما كنت يادوب بافكر

لسه بضفايرى الطويله

لسه فاكره طنط حكمت

فرحه كانت تملى بيتنا

جاره لكن ام لينا

كل يوم بتزور عيلتنا

ترسم الفرحه ف عنينا

وعم نظمى

كان بيغلط .. كل ثانيه

لما يناديني بأسمى

اجری تانی علیه وا قوله

حد ینسی اسم بنته؟

كنت بضحك ضحكه حلوه

ویا حوادیت جدتی

لسه فاكره..

لما كنت بلهفه اجري

لجل مالحق حصتى

سكتى انا والبنات

رسمت الاحلام حكايه

هی کل دنیتی

والبدايه لما كنت ف حضن امى

الحنان اللي باحسه

لما دقّت قلبها

بتناجى قلبي

ولا دمعتها عشائى

كات بتبكى

لو تحس انی حزینه

والجنينه

اللى يا ما رحتها وياك يا والدى

لما كنا بنجرى فيها واختى تضحك

لسه سامعه ضحكها

زی لحن جمیل ف ودنی

والبراءه اللي ف عيوننا

والحنين اللي ف قلوبنا

والامال اللي على شط الهوى..

یا ما بنیتها

قصر عالى وحلم غالى..

يحققه نسيج خيالي

زى الف ليله لما تزيد بليله

زى فسحه نيل مع النسمه الجميله

فرحه من غير اى خوف

ياما بتمنى تعود

ذكريات

لما بتمر ف خيالي

تخلق البسمه اللي ترسم ع الشفايف

ضحكتين

قلبى بيدور بشوق

جوه اركان الحنين

كل ثانية فيها فرحه

كل لحظه م الانين

طبطبه جبرت بخاطرى

من زمان

لسه حساها ياجدى

لما كنت ببص جوه عنيك حبايبي

قلبى لسه رغم سنه ..

حاسس انه

طفل لسه يادوب بيتعلم يخطى

ظل يرسم صوره حلوه

لطفله ببراءه تعدى

وبضفايرها الطويله

تربط الاحلام ف ايدها

ذكرياتها تجرى كالدم ف وريدها

عایشه بیها عمر کامل

لسه بنوته بضفاير

#### كفاياك يا ليل

كفياك يا ليل

كفاياك ألم وفراق اكيد

ونجوم بتهرب من قمر سهران وحيد

متخبي وسط غيوم .. حزين

كفاياك دموع ..

هو الفرح اصبح عليك ممنوع؟

القلب من كتر الوجع مابقاش سليم

والخط لو كان مستقيم ..

يوصل مابين النقطتين يادوب ..

باقصر الطرق

واللي اتحرق .. من ذكرياتنا المؤلمه

اصبح حقيقه مبهمه

والاااااااااه طريق

مكتوب على كل القلوب تمشيه

والااااااااااه صديق

بيصاحب الدمع ف عيون بتدارى فيه

تلاقیه ف کل وشوش تقابل سکته

ومخبياه ورا ضحكه ماتت من سنين

متشعلقين في وهم سموه الامل

متكتفين بحلم عمره ما اكتمل

بننام ياليل وعيوننا لسه مفتحين

والخوف من المجهول مالينا

دنيتنا فارقتنا خلاص مابقتش لينا

حتى الايدين اتفرقوا

بعد أما كانوا مشبكين

ولامتى بس؟؟

القلب مَلْ.. القلب كل

كل اللي قالوا الصبر حل

صبحوا عرايا الوهم غطاهم

ولسه برضه حلمهم ..

يتداروا فيه

# فراق محتوم

برغم نور الشمس

والضى والقمره

مشنوقه احلامنا

والموت قدر مكتوب

ايامنا بتعدى ولا مره بتهدى

والحب اصبح ذنب

ولابد منه نتوب

\*\*\*\*

امتى الامل يكبر ويمد لينا الايد

امتى نعيش بكره ونجدد المواعيد

امتى القلوب تعشق

تمحى بغرامها ذنوب

\*\*\*\*

بنغمى ف عيونا

وسكوتنا موت محتوم

لو يوم نشوف الفرح

الحزن فينا يدوم

قلب الحنين مجروح

بيداري في المعيوب

\*\*\*

اتفرقوا الاحباب

والفرقه نار قايده

موت القلوب داعذاب

نندم وايه الفايده

عايشين كما الاموات

واللى بنصبح فيه

نرجع وفيه بنبات

دنيا مابتسعنا

والدمع مش محسوب

\*\*\*

ماشيين طريق واعر

بايعين سنين العمر

شايلين هموم ياما

شاربين ف كاس المر

الضحكه خاصمتنا

ومفارقه سكتنا

والوحده سكنانا

مهما تحاوطنا قلوب

#### خيوط الفجر

وفاضل خطوتين دايما

وتتلاقى خطاوينا فى سكة شوق

وتخطفنا نجوم الليل ونهرب منها وياها

ونطلع فوق

على جناح الأمل بنطير

ودقات القلوب فينا تغرد لينا

تشجينا .. كما العصافير

وباسرح في الخيال وياك

واخر الكادر بالقاني تمللي معاك

وهاستناك

نحارب يوم جيوش البعد والاشواق

ومانسلمش بسهوله لأي فراق

وويانا تعيش احلامنا ف عيونا

وتخلق ضي

شعاع قمره ينادينا

بصوت مسموع ومالهوش زى

كأنه ف كل لحظه تروح

بيرسم خط أيامنا

ويبدر خير

ف يطرح حلم جوانا ويتحقق

ونلقاه جي

يقابلنا بشوق طاير

ونتلاقى

بضحكه حلوه تجمعنا

ونقطف ورد ايامنا .. وننسى الشوك

بنظره حب ليها معنى

ونتفرق على عهد اللقا دايما

ونعزف فرح

كامنجه لحن اوتارها كما الكروان

بيتغنى بلحن غرام

حرام قلبين فراقهم موت

سكوت مع ليل بيتبدل وينزف نور

يدور العمر بينا صحيح

لكن يرجع ويتعدل

بدقات القلوب بيننا .. ونستنا

خيوط الفجر تجمعنا وننسى الجرح

ونطرح م الحياه اوجاع

ونجمع نبض في قلوبنا بيمنع اي يوم لوداع

ونقسم ع الحياه فرحه

ونجمع كل ايامنا ونضربها في حلم وضاع

هايبقى ناتج الحسبه

يساوى قلب واتقسم مابين جسدين

#### حبيبي وبس

لمست الحلم بإيديا

ساعة مالمحت طيف نورك

وبحضورك ..

بتتغير ملامح فيا كات غامضه

وتتحول كتاب مفتوح .. بكل وضوح

باقول انك في قلبي النبض / وروح الروح

وشوقي للكلام وياك غلب صمتي

فابتحجج بأي كلام

وحتى لو مابينا خصام

عيون قلبي بتتكلم وتنطق شوق

وتبدأ في الكلام وياك

وتتمنى لو الأيام في عمري الجاي

تعيشها معاك

وبتغمض تشوف طيفك يراوضها ..

بحلم جميل

وليل وياك وبيطول مع قمره ف اجمل ليل

وكل نجومها سهرانه قناديله

وأناجيله بشوق قلبى وأناديله

فیخلق من حیاتی حیاه

وأقول الاااااااه فتتحول لبحر غريق

ندوس على شطه بهمومنا ..

فتتبدل لموج هادى وجو عليل

وعمر بنحصده بأيدنا جناين ورد

وأيام حلوه عشناها ومالهاش عد

ووعد مابينا يربطنا نعيش ..والحزن عنا بعيد

وباتأكيد ..

هايفضل ف العيون ضحكه...

بتكتب حبنا مواويل

بتتغنا صبا وسيكا

ودقات قلبي مزيكا بترقص ع النغم والحس

وبتقولك مافيش غيرك

حبيبي وبس



# آآآه يا قمري

أااه ياقمرى

بتناديني وهتلاقيني

جایه بجری

دنتا عمرى وضى عينى

وأنت قدرى

لو هترجع ليا نادم

وتقابلني بوجه باسم

هتلاقيني معاك بقاسم

حتى سرِّي



أاااه ياقمرى

عشت اتمنى وجودك

امته هتحقق وعودك

نفسى احس بشوق عيونك

امته تيجي ف حضن قلبي

أأأأه ياقمرى

ياله قرب من عيوني

مشتاقين لضمه منك

ليه تخيب فيك ظنونى

وقلبى عمره ماخاب فيه ظنك

ياكل املى

أاااه ياقمرى

مهما كنت جرحت قلبي

مش هينقص لحظه حبى

يالى عمرى ليك وهبته

وایه یساوی بس عمری

أااااه ياقمرى

يالا عوَّضني بحنانك

عايزه اعيش ويّاك زمانك

لو هتیجی برضه هاجی

نظره منك نور بيسري

أااااه ياقمري

## سنين فكه

وباستنا ..

شعاع الضى لمَّا ينور السكه

ويمحي ضلمة العمر اللي عدى يادوب.

سنين فكه

وباتكا على وجعي واقول يمكن

جراح العمر تتسكين

فيتبدل الامي بقرح

وهاستنا..

وهافضل عمري اتمنى ..

يروح الجرح

واعيش احلم وأنا برسم ف 100 ضحكه

ووسط طريقي بالقاها تقابلني.. مع النسمه

فاتلمسنى .. تحسسنى بشوق وحنين

وترجع تانى وتعدى معاها سنين..

وراها سنين

وانا حالفه بألف يمين

ما يسكن قلبي – بعد اليوم دا –

اي آلام

ومين يقدر يعيش الحزن لو لحظه

ولو حتى ضلام الدنيا جوايا..

راح اغسل روحي واتوضا.

وأصلى امام

وامد الشوف واتخيل سنين قُدام

وهاتكحل بأيامى اللى فيها براءه الدنيا

في وقت ماكنت بتغطى بأحلامي

والاقي عيونى سرحت فيها لو ثانيه

مابين اللحظه والتانيه.

اقرر انى احققها

وهاتدفا بشعاع الفرح

فيبدد في عتمة ليل

كان ساكن في قلبي زمان

## ممنوع م الصرف

والطَّرْف اللي مابيني وبينك

مبقاش موصول وتطول المده المحسوبه ايام وسنين اتنین کانوا یوم ف صحیح واحد فرقهم مین ماشيين شابكين الايد ف الايد وطريقهم مافيهوش اي سدود وجراح العمر ف ايامهم لو يوم صادف كان وقابلهم تلقاه بيفوت دلوقتي خلاص ف افيش العمر ككل حكايه تخلق نهابات. مجروحه دموعها بتنزف هم والسم المخلوط بعسلها مبقاش بيهم لو كل مشاعر حسينها يلقاها الموت

مش قلبي وبس دابدال القلب فيه ميه وألف.

ممنوع م الصرف ماتقولش نصيب ولازم هنشوف الماتقولش نصيب ولازم هنشوف ايامنا تعدى بأحلامنا يملاها الخوف بنعلق اخطاءنا ف اهه. ونقول دى ظروف

ونتوه مع دمعه بتشبهنا.

تتغير وياها ملامح وتلاقي الدنيا بتاخدنا ..دوران للخلف وعشان منا قلبي يادوب مكتوب

صفر علي شمال

ممنوع م الصرف بنعيشها ظنون

. . . . وكلام ف كلام ونقول عادى

کل ده بیهون

سكاكين بتقطع ف قلوبنا

بسلاح مسنون من اید احباب.لأ دول كانوا

س ہیے ہے۔۔۔۔۔۔۔۔۔۔ مبقوش احباب

وعذاب موصوف لجل مانفهم



الدنيا ونعمل ليها حساب كداب اللي يفكر انه.. هيعيشها سعيد هيعيشها سعيد والقمر اللي ينور كونه يطلعله وحيد بيعيد ف الاحزان ويلملم جرح العشاق مشتاق وبيرسم احلامه.. يطلعله فراق ف يصالح نفسه عشان يرضى لكن ... مجروووح واتاري الفرح مابيجيش غير... بطلوع الروح

## أمي

لما بسمع اى كلمه فيها امى او بشوف دموع لطفل يكون صغير بلقى دمعه نازله منى غصب عنى وألقى اهه م الوجع.. ومش قادره اعبر بالقى روحى سايبه روحى وتايهه منى مش بترجع تانى ليا مهما ادور انتى فين ... ؟ رحتى فين ؟ محتاجالك ياللي كنتي.. لیا اغلی من حیاتی سبتى ليه ايدي وهى ممدودالك

انتى فاكره انى ع الفرقه راح اقدر ارجعيلى....

ايوه لازم ترجعيلي

نفسى احكى اللي ف قلبي..

وانتى واخدانى ف حضنك

و بتسمعيلي

نفسك اقولك ياللي صورتك ساكنه قلبي

وياللي طيفك ف خيالي

لما كنتى تقولى احبك

كنت أقولك بس حبى ليكى اكتر

اعذريني.. اصلى انا مش قادره اصدق

غصب عنى قلبى عاش..

يحلم بقربك جنب منى

بس نفسى ف الفرح اشوف عيونكم

وألقى ضحكه كبيره وانتى بتحضنيني

يبقى ليه بتودعيني رحتى فين طب قوليلى ؟ او خدينى انتى ناسيه انى كنت معاكى ضلك كنت وياكى ف حزنك قبل فرحك انى عمرك ... بنت قلبك طب عشان خاطرى وخاطرك طمنيني انتى فين ؟؟؟ بس قولى ؟ انتى مش شايفه دموعى؟ انتى مش حاسه بحنينى ؟ نفسى اسمع تانى صوتك لما كنتى بتناديني ایوه کل شئ واحشنی اصلك انتى ضى عينى نفسى أشوفك أيوه نفسى حتى لو ف الحلم تيجى وتزوريني

# محتوى الكتاب

بطاقة الكتاب
محض افتراض
دقة سلف
أنت حياه
هو إنت إيه
فجر بيتولد
بشبهنی
عكس السير
ضحكة بتتولد غصبا
سبحان الله
ست الملاح
الليل يموت
صندوق الدنيا
جوايا حاجات
يعدين معاك

مجنونة رزينة	62
بنوته بضفاير	66
كفاياك ياليل	73
فراق محتوم	76
خيوط الفجر	<b>30</b>
حبيبي وبس	34
آآآآآآه ياقمري	87
سنين فكة	90
ممنوع من الصرف	93
أمىأمى	96
محتوى الكتاب	